



節婦遺跡，聖賢人廬里類，非正勿言。非正勿行。非正勿思。有過。卽於聖位前。自罰跪伏罪。

按先生常儀功，至老不解，病篤猶必衣冠，真仁爲己任死而後已者也。

理欲第二

先生曰。理欲之界。若一毫不清。則明德一義先失。刑于之際。若妻子未化。則親民一義先失。又何以止於至善乎。努力做去。定要在此處求自謙。乃是學者。○天行健。乾乾不息。天之誠也。人能長思敦其敬。而無怠惰之念。則幾於誠而合乎天矣。○爲人子者。不可因親之怒。卽不近前。必愈加言笑。致親之悅然後已。若曾子之耘瓜。薛包之灑掃。不廢晨夕。豈人所不能哉。○人若外面多一番發露。裏面便少一番著實。見人如不識字人。方好。○凡讀書。卽如古人面命。何書不當以敬對之。若不衣冠端坐看書。卽是侮慢古人。須深戒之。○善惡要知。更

要斷。知一善則斷然爲之。知一惡則斷然去之。庶乎善日積而惡日遠也。○惡人之心無過。常人之心知過。賢人之心改過。聖人之心寡過。寡過故無過。改過故不貳過。僅知過。故終有其過。常無過。故怙終而不改其過。○世俗非類相從。止知斥辱女子之失身。不知律以守身之道。男子之失身。更宜斥辱也。○學必求益。凡舉步覺無益就莫行。凡啟口覺無益就莫言。凡起念覺無益就莫思。○怠惰之容不設於身。淫肆之言不出於口。放僻之念不生於心。君子人與。君子人也。○友人陳印尼苦爲命困。先生曰。知命樂天四字相連。知之則樂之矣。曰非不知之。殊覺憂苦。先生曰。是知不真耳。君子之事天。如孝子之事親。愛之喜而不忘。惡之勞而不怨。豈有孝子真知親心而猶怨者乎。豈有君子真知天命而猶不樂者乎。○陽剛陰柔而天下定。陽下陰上而天下和。反而求之家也。身

也。心也。無不同也。今夫心天理陽念也。常令剛。人欲陰念也。常令柔。吾心有不定乎。天理雖爲主。而常合乎人情。陽下也。人欲雖無能絕。而常循乎天理。陰上也。吾心有不和乎。至於父兄惟其剛。子弟惟其柔。而又剛柔相得焉。其家無不定且和者矣。○讀書無他道。只須在行字著力。如讀學而時習。便要勉力時習。讀其爲人孝弟。便要勉力孝弟。如此而已。○或問禍福皆命中造定。信乎。先生曰。不然。地中生苗。或可五斗。或可一石。是猶人生之命也。從而糞壤培之。雨露潤之。五斗者亦可一石。若不惟無所培潤。又從而蠹賊之。摧折牧放之。一石者幸而五斗。甚則一粒莫獲矣。生命亦何定之有。夫所謂命一定者。不惡不善之中人。順氣數而終身者耳。大善大惡。固非命可囿也。在乎人耳。或大悅。○恩祖母老而重聽。先生大不釋曰。人子不早自盡。至此雖欲柔聲下氣。尙可得乎。若

不及時勉力。他日悔恨。更有不可勝言者矣。○人之治家。家衆若多。必使之各舉其職。則人愈多。家長愈樂。否則多一人。多卽一累矣。○一日心中不樂。忽慨然曰。心不虛則不樂。所謂心體上不可加一物也。雖然玩物而樂。離物則不樂。固非能樂者也。無物而樂。有物則不樂。亦非能樂者也。顏子簞瓢陋巷樂。不簞瓢陋巷亦樂。是何如樂。正宜理會。○學莫先於敬身。樂莫大於孝親。願言思之前。惟古人。近惟孫子。高陽人自識有云。無親非富。有母非貧。嗚乎大樂。孰如事親。○學者與聖賢不同。聖人忘其爲聖。賢人不敢恃其爲賢。學者要常見我爲正人君子。不然恐隨流逐污而不自覺矣。○學者自欺之患。莫大於以能言者爲己得。○人心中具有仁義位。育但得活理養之。則學成具全體大用。否則血肉腐朽而已矣。如雞卵中具有羽肉冠距。但得煖氣養之。則化成而飛鳴走食。否